

LUNARI pal 2002



Michela Papez Zorzenon

Al nestri vecjo asilo

Fevelâ dal nestri vecjo asilo no pol fâ che un gran plasê, ancja se chist a nus môf tanç biei ricuarts e tantis emozions, ormai forsi in part dismenteadis, ma simpri bielîs di gjavâ fûr das nestris plui zovinis memoriis.

Ai mei timps si diseva che a si lava a imparâ in asilo, a zujâ in tal bearts dal asilo e a robâ sêspis in tal 'zardin dal asilo.

Chist al sucedeva cuant che al asilo al jera dentri in ta chel gran palats nomenât "dal Paleologo", uê "Vila dal Tôr".

Timps di abundanza, ma solamentri di fruz però, parcè ca pal rest no si lava siguramentri in asilo cu la "merendina" in ta sacheta, casomai in ta ora di ricreazion a si veva un biel se fâ a butâ ju lis pignurelis dai àrbui, in mût di gjavâ e inglutî i pignui par comedasi un pôc al stomi.

Tant a è vera che una volta, mi ricuardi come cumò, un puar frut dal "Leon d'Oro", Luigino si clamava, al è muart sc'iafojât cul meti in bocja una gruessa scussa di pignurela.

Al vecjo asilo, ca sicuramentri duç a lu ricuardin cun tanta nostalgia ogni volta che passant davant di chel porton di fiar lu viòdin lajù in font dal bearts, al è stât implantât tal 1942, in timp dal "Duce", cuant ch'al palats al jera di proprietât di Redòlfo e Demètri Spiridione, fiô di Costantin, un grêc ch'al stava a Trièst.

In tal inizi a si clamava "Asilo Duchessa d'Aosta" e lis mèstris in chê volta a jerin la Mariuta, la Clelia e l'Ernesta, mentri al compit di preparâ la manasa pai fruz al jera stât afidât a lis coghîs Mariuta "Cublicja" (mari di Valentin al marangon) e l'Ana "Pedeona", sùr da Gioconda.

La "retta" a jera in chei timps di cinc liris al mês e i gurmâi a vignivin furnîs dal asilo, ch'al proviodeva ancja a lavàju.

Un an dopo, invezit, in tal asilo a àn cjapat servizi, come còghis e inservientis, dôs lezendaris figuris feminîlis, che pai fruts di

chei timps a jerin diventadis come dôs secondis màris.

Dôs bravis feminis che duç a Romans a lis ricuàrdin cun tant afiet, granda nostalgia e ancjamò plui ricognossinza, par dutis chês primuris che lôr a vevin in tai confrònz di chei fruts che da spês vaivin parzè che orevin tornâ a cjasa, o come in tal câs d'Ivaldi, ch'a dovevin dagi di mangjâ sot da sc'jalîs par via ch'a nol oreva savê di parâ jù la roba ch'a gi passava l'asilo.

La prima di chês dôs feminis a jera la Michela Papez Zorzenon, (25/09/1903 - 12/11/2001), che n'dà lavorât come còga e inservienta fin in tal 1957/58 e che di pôc nus à lassât, ch'al è stât l'ultin àn di vita dal asilo vecjo dentri dal palâz dal "Paleologo".

La seconda invezit, era l'Ortensia Calligaris (5/11/1917 - 16/1/1975), che à scomenzât a lavorâ in asilo in tal 1944 e jè stada in servizi par dîs àins di fila, ancja se par motifs di salût no à podût jessi simpri presinta.

In tal 1958 l'asilo al è stat siarât, cuant che il proprietari da vila al jera un ziar Jacum Culetto di Tresésin, chist in tal 1952 la veva comprada da 'Zorz e Mariùt Paleologo, fioi di Redòlf.

Lis ultimis mèstris in chel vecjo asilo a son stadis la Ana e la Pia di Gurizza.

In tal 1958/59 l'asilo l'è stât spuestât in tai locâi dal "Ricovery", fin a cualchi àn fa doprât come Cjasa di Polsâ pai anzians, indulà che la còga a jera la pura Francuta Petruz "Zetula", muarta ancjamò zovina cualchi an fa.

Infin tal 1959 al è stât inaugurât al gnôf asilo in via da Scuellis, ma chista a jè 'za storia di vuê.